



Republika e Kosovës • Republika Kosovo • Republic of Kosovo
Institucioni i Avokatit të Popullit • Institucija Ombudsmana • Ombudsperson Institution

RAPORT ME REKOMANDIME

I

MEKANIZMIT KOMBËTAR PËR PARANDALIMIN E TORTURËS

për

vizitën në Qendrën e Paraburgimit në Pejë

Për: Z. Abelard Tahiri, Ministër
Ministria e Drejtësisë

Z. Uran Ismaili, Ministër
Ministria e Shëndetësisë

Z. Milazim Gjocaj, Drejtor
Departamenti i Shëndetësisë në Burgje

Z. Nehat Thaçi, Drejtor i Përgjithshëm
Shërbimi Korrektues i Kosovës

Z. Sami Gashi, Drejtor
Qendra e Paraburgimit në Pejë

Prishtinë, më 22 nëntor 2018

Në pajtim me nenin 135, paragrafi 3 të Kushtetutës së Republikës së Kosovës dhe nenin 17 të Ligjit për Avokatin e Popullit nr. 05/L-019, Mekanizmi Kombëtar për Parandalim të Torturës i Avokatit të Popullit ka vizituar Qendrën e Paraburgimit në Pejë.

Datat e vizitës dhe përbërja e grupit monitorues

1. Në pajtim me nenin 17 të Ligjit 05/L-019 për Avokatin e Popullit, Mekanizmi Kombëtar për Parandalimin e Torturës (në tekstin e mëtejme "MKPT") i Avokatit të Popullit, më 4 tetor 2018, ka vizituar Qendrën e Paraburgimit në Pejë (në tekstin e mëtejme "QPP"). Grupi monitorues përbëhej nga dy juristë, një mjekë dhe një psikologe.

Historik i shkurtë për institucionin

2. Ndërtesa e QPP-së është ndërtuar ndërmjet viteve 1960-1961. Fillimisht ka funksionuar nën administrimin e UNMIK-ut dhe KFOR-it, deri në shkurt të vitit 2005, ku kompetencat e plota të menaxhimit i ka marrë stafi vendor. QPP-ja është e dedikuar për të paraburgosurit e regjioneve të afërta me Pejë, si dhe pranon personat për vuajtje të dënimit deri në tre muaj të shqiptuar nga Gjykata Themelore. Ky Institucion ka kapacitetin zyrtar prej 86 të burgosurish; ka gjithsej katër krahë - në tre krahë janë të vendosur të paraburgosurit dhe në një krah janë të vendosur të dënuarit me dënime të shkurtra.¹

Përshkrimi i përgjithshëm i institucionit

3. Të burgosurit janë të vendosur në krahët A, B, C dhe D. Kapaciteti i përgjithshëm është për 86 persona. Në kohën kur MKPT-ja e vizitoi këtë qendër, aty ishin të vendosur 89 të burgosur, prej tyre 7 të dënuar. Komiteti Evropian për Parandalimin e Torturës e ka vizituar QPP-në në vitin 2007 dhe 2015.²

4. Gjatë vizitës, MKPT-ja u njoftua nga drejtorja se janë njoftuar me gojë se duhet të fillojnë përgatitjet për mbylljen e QPP-së dhe transferimin e këtyre të paraburgosurve dhe të dënuarve për në Qendrën Korrektuese në Dubravë. Megjithatë, drejtorja ende nuk ka pranuar vendim konkret me shkrim nga Drejtorja e Shërbimit Korrektues së Kosovës.

5. Sipas drejtorisë, arsyeja kryesore e mbylljes së QPP-së është rekomandimi i Komitetit Evropian për Parandalim të Torturës (në tekstin e mëtejme "KPT") që kjo qendër të mbyllet, për shkak të mos përmbushjes së standardeve për kushtet e akomodimit.

6. MKPT-ja vëren se KPT-ja në raportin për vizitën në Kosovë në vitin 2007 dhe 2015 i përshkruan kushtet e akomodimit si shumë të këqija.

Qëllimi i vizitës

7. Qëllimi kryesor i vizitës ishte vlerësimi i kushteve fizike dhe materiale në Qendrën e Paraburgimit në Pejë, si dhe vlerësimi nëse këto kushte janë në pajtim me Ligjin për Ekzekutimin e Sanksioneve Penale, standardet e përcaktuara nga KPT-ja dhe standardet ndërkombëtare për mbrojtjen e të drejtave të personave të privuar nga liria.

¹ Të dhëna nga ueb-faqja e Shërbimit Korrektues të Kosovës, në: <http://shkk.rks-gov.net> (08.10.2018)

² Shih: <https://rm.coe.int/16806972c7> (14.11.2017), Raporti i KPT-së për vizitën në Kosovë në vitin 2007, publikuar në vitin 2009. Për më shumë shih në: <https://rm.coe.int/168069727c> (15.10.2018).

Bashkëpunimi me MKPT-në gjatë vizitës

8. Gjatë vizitës së MKPT-së në QPP, personeli i Shërbimit Korrektues dhe personeli i Departamentit Shëndetësor të Burgjeve, i ofruan ekipit monitorues bashkëpunim të plotë. Ekipi pa vonesa pati qasje në të gjitha hapësirat e QPP-së. Ekipit iu siguruan të gjitha informatat e nevojshme për të kryer detyrën dhe iu mundësuan intervistat me personat e dënuar dhe të paraburgosur, pa prezencë të zyrtarëve korrektues ose personelit tjetër.

Keqtrajtimi fizik

9. MKPT-ja, gjatë vizitave në QPP, ka intervistuar një numër të madh të të paraburgosurve dhe të dënuarve dhe nuk ka pranuar asnjë ankesë për keqtrajtim fizik apo përdorim të tepruar të forcës fizike nga zyrtarët korrektues.

10. Mirëpo, MKPT-ja ka pranuar një ankesë nga i paraburgosuri E. A., i cili pohoi se ishte keqtrajtuar fizikisht nga Polica e Kosovës në kohën e arrestimit. Sipas pohimeve të ankuesit, ai u arrestua më 13 shtator 2018 dhe u dërgua në stacionin policor në Prizren. Ankuesi pohoi se në stacion u lidh për radiatorit, u grushtua dhe shkelmua.

11. Prandaj, MKPT-ja përmes një shkrese zyrtare, ka kërkuar nga Inspektorati Policor i Kosovës (IPK) që ta hetojë rastin në fjalë dhe ta njoftojë MKPT-në e Avokatit të Popullit për rezultatin e hetimit.

Kushtet materiale

Kushtet e akomodimit

12. Kapaciteti zyrtar i QPP-së është për 86 persona. Gjatë vizitës në qelitë e QPP-së, MKPT-ja ka vërejtur se aktualisht numri i të burgosurve kishte arritur në 89 persona. MKPT-ja ka vizituar një numër të qelive dhe ka verifikuar se hapësira e akomodimit, ndriçimit dhe ventilimit nuk janë në pajtim me standardet e përcaktuara nga Komiteti Evropian për Parandalim të Torturës dhe me Ligjin për Ekzekutimin e Sanksioneve Penale.³

13. MKPT-ja ka vërejtur se në krahun B banjat e përbashkëta janë të dëmtuara, muret janë me lagështi, mbajnë erë myku, pajisjet sanitare janë të dëmtuara. Sa i përket hapësirës së banimit, KPT-ja ka përcaktuar se hapësira për të paraburgosurit apo të dënuarit në qeli duhet të jetë së paku 4m² për person në një hapësirë ku akomodohen më shumë se një person, pa përfshirë aneksin e tualeteve.

14. Po ashtu, Ligji për Ekzekutimin e Sanksioneve Penale parasheh se secili i burgosur duhet të ketë 4m² hapësirë në qeli të përbashkët.⁴ Gjatë vizitës, MKPT-ja ka vërejtur se në disa qeli, për shkak të mungesës së hapësirës, disa të paraburgosur dhe të dënuar flinin në dysheme në dyshek të vjetruar dhe të mykur pa mbulesa adekuate.

15. Siç u theksua në paragrafin 3 të këtij raporti, QPP-ja u vizitua dy herë nga KPT-ja. Sa i përket kushteve të akomodimit, KPT-ja në raportin për vizitën në Kosovë në vitin 2007 këto kushte i përshkruan si shumë të këqija dhe konstaton se madhësia e qelive nuk është në

³ Komiteti Evropian për Parandalim të Torturës, Hapësira e Banimit për një të Burgosur, shih: <https://rm.coe.int/16806cc449> (14.11.2017)

⁴ Ligji nr. 05/L0-129, neni 3 i Ligjit për Ndryshimin dhe Plotësimin e Ligjit nr. 04/L-149 për Ekzekutimin e Sanksioneve Penale.

përputhje me standardet e përcaktuara nga ky komitet. Përveç kësaj, në raport thuhet se qelitë nuk kanë ventilim dhe ndriçim të duhur.⁵

16. Po ashtu, KPT-ja në raportin për vizitën në Kosovë në vitin 2015 konstatoi se nuk ishin përmirësuar kushtet e akomodimit dhe përgjithësisht mbeten ashtu siç u konstatua edhe në raportin për vizitën në vitin 2007. Për më shumë, gjatë kësaj vizite, KPT-ja u njoftua nga autoritetet relevante të Republikës së Kosovës se planifikohet mbyllja e kësaj qendre. KPT-ja në raportin në fjalë i inkurajoi autoritetet e Republikës së Kosovës që ta mbyllin Qendrën e Paraburgimit në Pejë sa më shpejtë që të jetë e mundur. Më tej KPT-ja konstaton: “Për sa kohë që kjo qendër është në përdorim, duhet bërë përpjekje për të siguruar që anekset sanitare të mbahen në gjendje të pranueshme sa i përket kushteve fizike dhe që të burgosurve t’u sigurohen 4m² hapësirë për person në qelitë ku akomodohen më shumë se një i paraburgosur”.⁶

17. Rregullat Evropiane të Burgjeve, në rregullin 18.1 dhe 18.2, përcaktojnë obligimin e autoriteteve për t’u siguruar burgosurit kushte, të cilat respektojnë dinjitetin e njeriut, privatësinë dhe që përmbushin kërkesat shëndetësore dhe higjienike, t’u kushtohet vëmendje e duhur kushteve klimatike, madhësisë së qelive dhe ajrosjes, ndriçimit, ventilimit dhe ngrohjes.

18. Po ashtu, Rregulli numër 13 i Rregullave të Mandelës, të miratuara nga Organizata e Kombeve të Bashkuara, përcakton: “Hapësirat e akomodimit për të burgosurit duhet të plotësojnë të gjitha kërkesat shëndetësore, vëmendje e veçantë duhet t’u kushtohet kushteve klimatike dhe veçanërisht ajrosjes, hapësirës minimale për banim, ndriçimit, ngrohjes dhe ventilimit”.

Mbipopullimi

19. MKPT-ja u njoftua nga drejtorja se kapaciteti zyrtar i Qendrës së Paraburgimit në Pejë është për 86 persona. Gjatë vizitës së MKPT-së ishin të akomoduar 89 persona. Për shkak të madhësisë joadekuate të qelive dhe numrit joadekuat të personave të akomoduar në to, mbipopullimi bëhet edhe më i theksuar. MKPT-ja vlerëson se autoritetet relevante duhet të ndër marrin veprime për ta evituar këtë gjendje.

Kuzhina

20. MKPT-ja vlerëson se kuzhina nuk i plotëson as kushtet elementare, pasi që hapësirat e saj janë shumë të vogla, pa dritë natyrale, mjetet për të punuar janë të vjetërsuara, të dëmtuara dhe të improvizuara nga vetë punëtorët. Ushqimi ishte i vendosur në një dhomë të posaçme dhe me afat të gjatë të përdorimit. MKPT-ja ka vërejtur se të gjithë punëtorët në kuzhinë i posedojnë librezat sanitare valide. Sipas personelit të kuzhinës dhe konstatimit të MKPT-së, kuzhina përmban edhe ushqim dietal për kategori të caktuara të të paraburgosurve dhe të dënuarve, varësisht nga gjendja e tyre shëndetësore.

⁵ Raporti i KPT për vizitën në Kosovë në vitin 2007, publikuar në vitin 2009, në: <https://rm.coe.int/168069727c> (15.10.2018).

⁶ Raporti i KPT për vizitën në Kosovë në vitin 2015, paragrafi 41. Për më shumë shih në: <https://rm.coe.int/16806a1efc> (15.10.2018).

Regjimi

21. Në QPP tash për tash janë të angazhuar në punë rreth tetë të paraburgosur dhe tre të dënuar. Të paraburgosurit mund të dalin në ajrosje (shëtitje) dy herë në ditë në kohëzgjatje prej 1 orë.⁷ Qendra e Paraburgimit në Pejë, posedon një shëtitore mjaft të vogël, në të cilën gjendet vetëm një tabelë e pingpongut. QPP nuk ka mundësi që të paraburgosurve dhe të dënuarve t'u ofrojë aktivitete të tjera, përveç shëtitjes dhe shikimit të TV në qeli. Kështu që, të paraburgosurit dhe të dënuarit shumicën e kohës së tyre e kalojnë të mbyllur në qelitë e tyre.

22. MKPT-ja vlerëson se regjimi për të paraburgosurit mbetet i varfër, pavarësisht përpjekjeve të drejtorisë për të ofruar më shumë aktivitete për të paraburgosurit. Për më shumë, në rastin e të paraburgosurve shpesh nevojitet leja nga gjykata kompetente, në mënyrë që ata të angazhohen në punë ose ndonjë aktivitet specifik.

23. MKPT-ja konsideron se sa më e gjatë të jetë periudha e mbajtjes në paraburgim, po aq duhet të jetë i zhvilluar edhe regjimi që u ofrohet.

Kontaktet me botën e jashtme

24. Legjislacioni në fuqi⁸ për rastin e personave të dënuar përcakton se të burgosurit e dënuar kanë të drejtë të pakufizuar të korrespondencës (që u nënshtrohen përjashtimeve të caktuara), kanë të drejtë për një vizitë në muaj, e cila zgjatë më së paku një orë, si dhe në vizitë nga fëmijët dhe bashkëshortet e tyre, së paku një herë në 3 muaj, me kohëzgjatje minimale prej tri orësh. Përveç kësaj, ata kanë të drejtë për të bërë telefonata.

25. Lidhur me telefonatat, Udhëzimi Administrativ për Rendin Shtëpiak në Institucionet Korrektuese⁹ përcakton se i dënuari ka të drejtë në biseda telefonike me anëtarët e familjes së ngushtë dhe me personat e tjerë. Sipas këtij udhëzimi, biseda telefonike e personit të dënuar dhe të paraburgosur nuk mund të jetë më e gjatë se 15 minuta. MKPT-ja nuk ka pranuar asnjë ankesë nga të paraburgosurit dhe të dënuarit lidhur me këtë të drejtë.

26. Në rastin e të paraburgosurve, neni 200 i Kodit të Procedurës Penale të Kosovës përcakton se të paraburgosurit mund të pranojnë vizita "brenda kufijve të rregullave të qendrës së paraburgimit", bazuar në lejen e gjyqtarit të procedurës paraprake dhe nën mbikëqyrjen e tij. Më tej, Kodi përcakton se korrespondenca dhe vizitat tjera i nënshtrohen vendimit të gjyqtarit të procedurës paraprake.

27. Avokati i Popullit ose përfaqësuesit e tij mund t'i vizitojnë të paraburgosurit dhe të korrespondojnë me ta, pa paralajmërim paraprak dhe pa mbikëqyrjen e gjyqtarit të procedurës paraprake, gjyqtarit të vetëm gjykues apo kryetarit të trupit gjykues, ose personave tjerë të emëruar nga gjyqtari i tillë. Letrat e të paraburgosurit dërguar Institucionit të Avokatit të Popullit, nuk mund të kontrollohen. Avokati i Popullit dhe përfaqësuesit e tij mund të komunikojnë gojarisht ose me shkrim në mënyrë konfidenciale me të paraburgosurit.

⁷ Rregullat e Mandelës, neni 23. Rregullat Evropiane të Burgjeve, neni 27.1. Standardet e Komitetit Evropian për Parandalim të Torturës, paragrafi 48, publikuar në vitin 2015. Sipas nenit 37 të Ligjit për Ekzekutimin e Sanksioneve Penale, të dënuarit kanë të drejtë në së paku dy orë shëtitje në ditë.

⁸ Ligji për Ekzekutimin e Sanksioneve Penale, nenet 62-65.

⁹ Udhëzimi Administrativ për Rendin Shtëpiak në Institucionet Korrektuese, neni 54.

28. Në rastin e shtetasve të huaj, atyre u ofrohet mundësia që me shkrim ose me gojë të kontaktojnë me përfaqësinë diplomatike, apo zyrën përkatëse të shtetit, i cili mban shtetësinë e tij.¹⁰ MKPT-ja nuk ka pranuar ankesa nga të dënuarit apo të paraburgosurit lidhur me të drejtën për kontakte me botën e jashtme.

Kujdesi shëndetësor

29. MKPT-ja nuk ka pranuar ankesa nga të paraburgosurit dhe të dënuarit lidhur me kujdesin shëndetësor. MKPT-ja ka vërejtur se shërbimet mjekësore në Qendrën e Paraburgimit në Pejë jepen në pajtim me kërkesat dhe nevojat e të paraburgosurve. Në përbërje të njësisë shëndetësore është një mjek i rregullt me orar të plotë, shtatë infermierë, prej tyre një është kryeinfermiere, kurse gjashtë infermierët tjerë punojnë 12 orë në ditë me ndërrime. Sipas nevojës, psikologu vjen nga Qendra Korrektuese në Dubravë, ndërsa psikiatri është i angazhuar me orar të shkurtuar, dhe sipas informatave, vjen sipas nevojës. Ndërsa shërbimet e stomatologjisë ofrohen po ashtu në Qendrën Korrektuese në Dubravë.

30. Megjithatë, infrastruktura ku realizohen shërbimet mjekësore nuk i plotëson as kushtet minimale, mungon drita natyrale, nuk ka dhomë të veçantë për vizitë të pacientëve apo aplikim të terapisë. Higjiena mbahej nga vetë infermierët.

31. Transporti i të burgosurve për të marrë shërbime mjekësore në institucionet tjera shëndetësore jashtë QPP-së bëhet me automjet të Shërbimit Korrektues.

Regjistrat

32. Njësia shëndetësore në QPP i ka të evidentuara të gjitha protokollet e duhura. MKPT-ja ka vërejtur regjistrat si në vijim: dosja mjekësore e pacientit, regjistri i infermierit me ndërrime, terapitë, ankesat apo kërkesat për vizitë të radhës te mjeku, dërgimit të pacientit për trajtim jashtë ambulancës së burgut, të vetëlëndimit, të lëndimeve trupore, të abuzimeve seksuale, grevës së urisë, tentim vetëvrasje, të vetmisë, të vdekjes në burg.

Kontrolli mjekësor

33. Komiteti Evropian për Parandalimin e Torturës, në raportin për vizitën në Kosovë në vitin 2015, ka theksuar rëndësinë esenciale që kanë kontrollet mjekësore, sidomos në rastet e të burgosurve apo të paraburgosurve të sapo pranuar, jo vetëm për identifikimin e sëmundjeve infektive dhe parandalimin e vetëvrasjeve, por edhe nëpërmjet kontributit i cili jepet në aspektin e parandalimit të torturës përmes evidentimit të duhur të lëndimeve.

34. QPP-ja e njoftoi ekipin e MKPT-së se të sapo pranuarit kontrollohen brenda afatit prej 24 orësh nga momenti i arritjes në Qendër. Këto kontrolle nënkuptojnë një kontroll të përgjithshme gjatë së cilës i burgosuri pyetet nëse ka ndonjë sëmundje, e cila nëse deklarohet, regjistrohet në dosjen e tij mjekësore.

Konfidencialiteti i shërbimeve mjekësore

35. MKPT-ja është interesuar nëse personeli mjekësor u ofron shërbimet mjekësore të dënuarve dhe të paraburgosurve në QPP në prani të zyrtarëve korrektues. Gjatë vizitës, MKPT-ja konstatoi se shërbimet mjekësore në ambulancën e burgut jepen pa praninë e

¹⁰ Ligji për Ekzekutimin e Sanksioneve Penale, neni 33, paragrafi 1.

zyrtarëve korrektues, si dhe zyrtarët korrektues nuk kanë qasje në dosjet shëndetësore të të burgosurve. MKPT-ja përkrah një qëndrim dhe praktikë të tillë që zyrtarët e sigurisë të mos jenë të pranishëm gjatë dhënies së shërbimeve mjekësore.¹¹

Çështje të ndërlidhura me sigurinë

36. MKPT-ja u njoftua nga drejtorja se të gjitha pavijonet dhe objektet e QPP-së janë të pajisura me kamera të sigurisë, të cilat, sipas KPT-së, përbëjnë një nga garancitë për mbrojtje nga keqtrajtimi.¹²

37. MKPT-ja, sikurse në raportet tjera, këshillon autoritetet relevante që të krijojnë mundësi teknike për ruajtjen për një kohë më të gjatë të të dhënave të regjistruara nga kamerat e sigurisë, sepse kjo do të mundësonte hetimin në mënyrë më efektive të pohimeve eventuale për keqtrajtim apo përdorim të tepruar të forcës fizike.

Procedura e parashtrimit të ankesave

38. Sistemi efektiv i parashtrimit të ankesave është garanci themelore kundër keqtrajtimit në burgje dhe në qendra të paraburgimit. Personat e vendosur në këto qendra duhet të kenë mundësi për të parashtruar ankesë brenda burgut apo qendrës së paraburgimit ku akomodohen dhe që në mënyrë konfidenciale t'u mundësohet qasja tek autoriteti i duhur.

39. Neni 91 i Ligjit për Ekzekutimin e Sanksioneve Penale, përcakton në hollësi procedurën sipas së cilës të paraburgosurit dhe të dënuarit mund t'i drejtohen me ankesë apo lutje drejtorit të një institucioni të caktuar të Shërbimit Korrektues të Kosovës. Procedura përfshin edhe afatet për përgjigje nga drejtori dhe mundësinë që ankesa t'i drejtohet një autoriteti më të lartë, që në rastin e tanishëm është Drejtorja e Përgjithshme e Shërbimit Korrektues dhe ministri i Drejtësisë.¹³

40. MKPT-ja ka vërejtur se QPP janë kutitë e ankesave të vendosura nga Shërbimi Korrektues i Kosovës dhe kutitë e ankesave të vendosura nga Institucioni i Avokatit të Popullit, të cilat u shërbejnë të burgosurve. Kutitë e ankesave të vendosura nga Institucioni i Avokatit të Popullit mund të hapen vetëm nga personeli i këtij institucioni, gjë që për ankuesit ofron konfidencialitet në parashtrimin e ankesës.

41. MKPT-ja nuk ka pranuar ankesa nga të paraburgosurit dhe të dënuarit lidhur me çështjen e parashtrimit të ankesave apo vonesa për të shqyrtuar ankesat e tyre brenda afatit ligjor.

¹¹ Komiteti Evropian për Parandalimin e Torturës në raportin për Kosovën pas vizitës në Kosovë në vitin 2015, pati vërejtje lidhur me ofrimin e shërbimeve mjekësore në prezencë të zyrtarëve korrektues dhe rekomandoi ndërprerjen e praktikave të tilla.

¹² KPT, raporti për vizitën në Irlandë në vitin 2010, paragrafi 18.

¹³ Neni 91, paragrafi 4 i Ligjit për Ekzekutimin e Sanksioneve Penale përcakton: Në ankimin e paraqitur drejtori i institucionit korrektues do të përgjigjet në afat prej pesëmbëdhjetë (15) ditësh, ndërsa Zyra Qendrore e Shërbimit Korrektues në afat prej tridhjetë (30) ditësh. Në ankimin me shkrim do të jepet përgjigja në formën me shkrim.

Në bazë të të gjeturave dhe konstatimeve të arritura gjatë vizitës, në pajtim me nenin 135, paragrafi 3 të Kushtetutës së Republikës së Kosovës dhe nenin 16, paragrafi 4 të Ligjit 05/L019 për Avokatin e Popullit, Avokati i Popullit i rekomandon:

Ministrisë së Drejtësisë:

- **Ministria e Drejtësisë të njoftojë Avokatin e Popullit lidhur me pretendimet e punonjësve të QPP-së se kjo Qendër do të mbyllet.¹⁴**
- **Të krijohen kushte dhe hapësirë adekuate të punës për personelin mjekësor.**
- **Numri i të paraburgosurve të akomoduar të jetë në pajtim me kapacitetin zyrtar të QPP-së dhe të zgjidhet çështja e mbipopullimit sa më shpejtë që të jetë e mundur.**
- **Kushtet e akomodimit, përderisa kjo qendër është në përdorim, të jenë në pajtim me standardet minimale të përcaktuara me Ligjin për Ekzekutimin e Sanksioneve Penale; me standardet e KPT-së dhe me standardet tjera ndërkombëtare për mbrojtjen e të drejtave të të burgosurve.**

Në pajtim me nenin 132, paragrafi 3 të Kushtetutës së Republikës së Kosovës (“Çdo organ, institucion ose autoritet tjetër, që ushtron pushtet legjitim në Republikën e Kosovës, është i detyruar t’u përgjigjet kërkesave të Avokatit të Popullit dhe t’i paraqesë atij/asaj të gjitha dokumentet dhe informacionet e kërkuara në pajtim me ligj”) dhe nenin 28 të Ligjit nr. 05/L-019 për Avokatin e Popullit (“Autoritetet, të cilave Avokati i Popullit u ka drejtuar rekomandim, kërkesë ose propozim për ndërmarrjen e veprimeve konkrete, përfshirë edhe masat disiplinore, duhet të përgjigjen brenda afatit tridhjetë (30) ditor. Përgjigjja duhet të përmbajë arsyet me shkrim për veprimet e ndërmarra lidhur me çështjen në fjalë”), mirësisht ju lutemi të na informoni për veprimet e ndërmarra lidhur me çështjen në fjalë.


Me nderime,
Hilmi Jashari
Avokat i Popullit

¹⁴ Më 3 tetor 2018, Avokati i Popullit ka pranuar ankesë nga personeli i Qendrës së Paraburgimit në Pejë, duke pretenduar se kjo qendër do të mbyllet dhe personeli do të transferohet në Qendrën Korrektuese në Dubravë.